
Topik ► Kaedah Asas 4:

6 Kemudarat Mesti Dihilangkan atau Dihapuskan

(الضرر يزال)

HASIL PEMBELAJARAN

Pada akhir topik ini, anda seharusnya dapat:

1. Menyatakan maksud Kaedah Asas 4 (kemudarat mesti dihilangkan atau dihapuskan) berserta contohnya;
2. Menjelaskan istilah yang berkaitan dengan Kaedah Asas 4;
3. Menerangkan sumber asal atau dalil Kaedah Asas 4;
4. Menghuraikan enam pecahan kaedah daripada Kaedah Asas 4; dan
5. Merumuskan bagaimana kaedah ini digunakan dalam isu perubatan semasa.

► PENGENALAN

Kaedah kemudaratian mesti dihilangkan atau dihapuskan (al-darar yuzal) merupakan kaedah asas keempat yang utama digunakan oleh ulama dalam perundangan Islam. Tahukah anda bahawa kaedah ini juga disebut sebagai “al-qawa'id al-khams al-kubra”?

Aplikasi kaedah ini adalah cukup meluas dalam pelbagai isu fiqhiyyah. Ia penting kerana mengandungi kebaikan yang menyeluruh kepada syariah Islamiyyah. Oleh itu, topik keenam ini akan membincangkan pengertian dan penghuraian kaedah, contoh, beberapa istilah yang berkaitan dengannya, sumber asal atau dalil kaedah, beberapa kaedah pecahannya dan bagaimana kaedah ini digunakan dalam situasi perubatan semasa. Mari kita teruskan pembelajaran!

6.1 PENGERTIAN DAN HURAIAN KAEDAH ASAS 4

Apakah yang dimaksudkan dengan kaedah ini? Kaedah ini memberi pengertian bahawa sebarang bentuk kemudaratian (seperti kesakitan, ancaman, kemasuhanan, kerugian, kecacatan, kesukaran, kacau-bilau dan hilang fungsi) wajib dihilangkan dan dihapuskan sama ada terhadap dirinya sendiri atau orang lain, terhadap mana-mana individu atau orang awam dan seluruhnya.

Apabila telah berlaku sesuatu yang memudaratkan, sedang berlaku atau akan berlaku di mana terdapat sesuatu yang boleh mendatangkan bahaya, maka ia hendaklah dihapuskan serta-merta. Justeru, sesiapa sahaja tidak boleh sama sekali melakukan atau membuat kerosakan dan kemudaratian, sama ada kemudaratian tersebut berkaitan dengan hak umum atau hak khusus. Ini adalah kerana menurut pandangan Islam, kemudaratian ini **wajib dihapuskan**.

6.2 CONTOH APLIKASI KAEDAH ASAS 4

Bolehkah anda berikan beberapa contoh bagi kaedah ini? Antara contoh yang terbentuk daripada kaedah ini ialah:

- (a) Disyariatkan **hudud** dan **qisas** untuk mengelakkan bahaya, ancaman atau kecacatan dalam masyarakat, di samping untuk memelihara lima prinsip umum atau dharuriyyat al-khams iaitu jiwa, agama, akal, keturunan dan harta;
- (b) Disyariatkan **hukuman takzir** untuk mencegah sebarang bentuk bahaya demi menjaga kemaslahatan umum;

- (c) Disyariatkan **semua bentuk khiyar** yang ditetapkan oleh syarak untuk menghilangkan bahaya dan mengelakkan sesuatu yang tidak diingini berlaku. Sebagai contoh, khiyar syarat dalam transaksi jual beli. Ia bertujuan untuk mengelakkan penipuan dan kerugian berlaku bagi orang yang tidak berpengalaman dalam urusan jual beli. Sementara itu, khiyar rukyah pula dilaksanakan untuk menghindarkan kerugian ketika urusan jual beli di mana pembeli menerima barang yang tidak sesuai dan tidak mengikut spesifikasi awal yang diminta pada awal transaksi. Dalam khiyar ‘aib pula, pembeli mempunyai hak untuk membatalkan kontrak jual beli kerana kecacatan barang yang dibelinya, kecuali sekiranya penjual bersetuju untuk menggantikan barang yang cacat tersebut dengan barang lain yang sempurna; dan
- (d) Diharuskan memenjarakan atau mengenakan hukuman bagi pengamal ajaran sesat atau individu yang berpotensi boleh menjasakan atau merosakkan akidah umat Islam. Ia diharuskan demi maslahah agama dan umat Islam.

Sebagai kesimpulannya, Islam merupakan agama yang amat prihatin terhadap lima kepentingan asas manusia iaitu **agama, akal, diri, keturunan** dan **harta**. Justeru, Islam membuka seluasnya semua ruang yang boleh memberi kebaikan dan kesejahteraan kepada manusia dengan menutup segala ruang yang boleh menjasakan kehidupan manusia. Lantaran itu, Islam mengharamkan semua perkara yang boleh mendatangkan kemudaratan kepada lima perkara asas tersebut. Ini adalah kerana sekiranya dibiarkan, ia akan menyebabkan mereka yang terlibat akan mengalami kesusahan, kerumitan, kerugian dan pelbagai bebanan dalam kehidupan dan seterusnya, akan turut mengancam dan boleh mengundang bahaya kepada kehidupan manusia.

Oleh itu, ulama dan sarjana Islam telah menetapkan bahawa sesuatu yang boleh memudarangkan umat Islam adalah wajib dihindar dan dihapuskan. Ini adalah selaras dengan ungkapan al-Syatibi yang bermaksud bahawa sesungguhnya, syariat itu diasaskan untuk membawa kemaslahatan kepada manusia.



AKTIVITI 6.1

- Huraikan dengan jelas maksud kaedah kemudaratan mesti dihilangkan atau dihapuskan.
- Bincangkan dengan tutor anda kepentingan kaedah kemudaratan mesti dihilangkan atau dihapuskan dalam perundangan Islam.
- Bincangkan secara berkumpulan contoh semasa yang berkaitan dengan kaedah kemudaratan mesti dihilangkan atau dihapuskan khususnya dalam ibadah harian anda.

6.3

PENGERTIAN ISTILAH PENTING YANG TERDAPAT DALAM KAEDAH ASAS 4

Tahukah anda terdapat beberapa istilah penting yang berkait rapat dengan kaedah ini? Terdapat enam istilah yang berkait rapat dengan Kaedah Asas 4. Istilah tersebut diterangkan dalam Jadual 6.1.

Jadual 6.1: Istilah Penting dalam Kaedah Asas 4

Istilah	Huraian
Darurat (صَرْرَة)	Ia merujuk kepada situasi seseorang yang amat memerlukannya. Sekiranya perkara tersebut tidak diperoleh atau dihindari akan menyebabkan dia terdedah kepada bahaya. Dalam konteks ini, ia merujuk kepada ketika tiada alternatif lain setelah usaha dilakukan dan implikasi buruk atau kemudaratan secara yakin akan berlaku terhadap salah satu al-daruriyyat al-khams (agama, nyawa, akal, harta dan keturunan).
Hajat (حاجة)	Ia bermaksud sesuatu yang membawa ke arah kemudahan untuk mencapai apa yang dimaksudkan dan bukan untuk menghindarkan bahaya seperti dalam keadaan darurat.
'Ammah (عَامَة)	Merujuk kepada sesuatu keperluan yang meliputi seluruh umat manusia atau dengan kata lain, keperluan umum.
Khassah (خَاصَّة)	Bermaksud keperluan sesuatu golongan tertentu yang bukan berbentuk individu.
Mafsadah (مَفْسَدَة)	Merujuk kepada sesuatu yang mendatangkan kerosakan, kebinasaan, keburukan dan seumpamanya.
Maslahah (مَصْلَحَة)	Bermaksud sesuatu yang mendapat manfaat, faedah dan kebaikan serta yang memberi kesan positif.

6.4 KATEGORI MAQASID SYARIAH

Dalam subtopik 6.2 tadi ada disebutkan tentang al-Syatibi. Kita teruskan pembelajaran kita dengan mempelajari maqasid syariah menurut pandangan al-Syatibi. Menurutnya, maqasid syariah secara dasarnya terdiri daripada **tiga kategori** seperti yang ditunjukkan dalam Rajah 6.1.



Rajah 6.1: Tiga hierarki maqasid syariah

Hierarki dalam Rajah 6.1 menerangkan bahawa terdapat tiga tahap keperluan manusia yang amat penting untuk dipenuhi secara seimbang bagi kesejahteraan kehidupan mereka. Huraian lanjut mengenai ketiga-tiga tahap keperluan ini adalah seperti yang dinyatakan dalam Jadual 6.2 berikut.

Jadual 6.2: Tiga Tahap Keperluan Manusia

Tahap	Huraian
Perkara Penting (Daruriyyat)	Dalamnya terangkum daruriyyat al-khams (lima keperluan utama) iaitu agama, nyawa, akal, keturunan dan harta, termasuklah juga maruah yang amat diperlukan oleh setiap manusia. Seandainya salah satu keperluan tersebut tidak dipenuhi dengan sebaiknya maka ia akan memberi kesan yang boleh mengancam kehidupan manusia. Sebarang perkara dan tindakan yang mencabul kelima-lima perkara asas tersebut boleh membawa kepada kerosakan. Pengabaianya juga boleh membawa kepada kehancuran dan keruntuhan kehidupan manusia. Contohnya seperti Islam yang mengharamkan apa jua tindakan yang boleh mengancam nyawa, akal seseorang sama ada pada diri sendiri ataupun orang lain.
Keperluan (Hajjiyyat)	Ia merupakan satu keperluan oleh manusia bagi mengelakkan kesusahan dalam kehidupan mereka. Contohnya seperti mendedahkan aurat sekadar perlu kepada doktor untuk tujuan perubatan ataupun seseorang itu berbuka puasa pada bulan Ramadan dengan sebab sakit atau musafir.

Pelengkap (Tahsiniyyah)	Ini merupakan keperluan oleh manusia untuk menjamin kelancaran kehidupan mereka. Contohnya, menjaga adab dalam bersosial, berpolitik dan seumpamanya.
----------------------------	---

Berdasarkan penjelasan dalam Jadual 6.2 tadi, kita dapat rumuskan bahawa kesejahteraan kehidupan manusia boleh dicapai, sekiranya lima perkara asas tersebut dijaga dan dipelihara dengan sebaiknya. Oleh kerana itulah, ulama telah mengambil beberapa kaedah hukum untuk menjaganya. Antaranya ialah dengan menggunakan kaedah kemudaratan mesti dihilangkan atau dihapuskan dan kaedah cabangan darinya sebagai salah satu mekanisme untuk membantu dan menyelesaikan pelbagai masalah yang timbul.

6.5 SUMBER ASAL ATAU DALIL KAEDAH ASAS 4

Asal atau dalil kaedah didasarkan atau dirujuk kepada dalil **al-Quran** dan **hadis**. Antaranya ialah seperti yang disenaraikan dalam Jadual 6.3.

Jadual 6.3: Dalil Kaedah Asas 4

Sumber	Dalil
Al-Quran	<p style="text-align: right;">وَلَا تُضَارُوهُنَّ لِتُضَيِّقُوْا عَلَيْهِنَّ</p> <p>Maksudnya: "Dan janganlah kamu adakan sesuatu yang menyakiti mereka (di tempat tinggal itu) dengan tujuan hendak menyusahkan kedudukan mereka (supaya mereka keluar meninggalkan tempat itu)." (Surah al-Talaq, 65:6)</p>
	<p style="text-align: right;">وَاللَّهُ لَا يُحِبُّ الْمُفْسِدِينَ</p> <p>Maksudnya: "Allah tidak suka kepada orang yang melakukan kerosakan."</p> <p style="text-align: right;">(Surah al-Baqarah 2:23)</p>
Hadis	<p style="text-align: right;">لَا ضَرَرَ وَلَا ضِرَارَ</p> <p>Maksudnya: "Tidak membahayakan diri sendiri dan tidak membahayakan orang lain." (Ibn Majah, Kitab: al-Ahkam, Bab: Man bana fi haqqihi, Bil. 2332. Malik, Kitab: al-Aqdiyah, Bil. 1234. Ahmad, Bab: Wa min musnad bani Hasyim, Bil. 2719)</p>

**AKTIVITI 6.2**

1. Huraikan dengan jelas pengertian istilah “ammah” dan “khassah” serta berikan satu contoh yang sesuai.
2. Bincangkan bersama rakan sekelas anda perbezaan antara darurat dengan hajat.
3. Kemukakan tiga dalil daripada al-Quran yang membincangkan perkara darurat.

6.6**CABANG ATAU PECAHAN KAEDAH ASAS 4**

Tahukah anda, daripada kaedah asas kemudaratan mesti dihilangkan (al-darar yuzal) terbentuk daripadanya enam kaedah lain? Enam kaedah tersebut adalah seperti yang disenaraikan dalam Jadual 6.4.

Jadual 6.4: Enam Kaedah Pecahan daripada Kaedah Asas (4) Al-Darar Yuzal

Kemudaratan mesti Dihilangkan atau Dihapuskan (الضرر يزال)	
1.	Keadaan darurat mengharuskan perkara yang dilarang (الضرورات تبيح المحتظرات)
2.	Apa yang diharuskan dalam keadaan darurat dikira mengikut kadar keperluannya sahaja (ما أبیح للضرورة يقدّر بقدرها)
3.	Kemudaratan tidak boleh dihilangkan dengan mendatangkan kemudaratan yang lain (الضرر لا يزال بالضرر)
4.	Apabila bertentangan antara dua kemudaratan, hendaklah dihindarkan yang lebih berat dan dilaksanakan yang lebih ringan (إذا تعارض مفسدتان روعي اعظمهما ضرراً بازكياب أخفهما)
5.	Menolak kerosakan itu diutamakan atau didahulukan daripada mengambil manfaat atau kemaslahatan (درء المفاسد مقدم على جلب المصالح)
6.	Keperluan atau hajat menempati kedudukan darurat sama ada yang bersifat umum atau khusus (الحاجة تنزل منزلة الضرورة عامةً كانت أو خاصةً)

Kita akan mempelajari keenam-enam pecahan kaedah ini dengan lebih lanjut dalam bahagian seterusnya.

6.6.1 Kaedah Pecahan 1: Keadaan Darurat Mengharuskan Perkara yang Dilarang (Al-Darurah Tubih al-Mahzurat)

Kaedah ini bermaksud, apabila seseorang itu berhadapan dengan keadaan yang mendatangkan **mudarat** kepada dirinya, maka diharuskan ketika itu untuk melakukan perkara yang haram. Namun, keharusan itu hanyalah sekadar untuk melepaskan keadaannya yang dalam keadaan **darurat** dan dia tidak boleh mengambil kesempatan untuk berlebih-lebihan serta tidak cenderung untuk melakukannya melainkan kerana keadaan pada waktu itu sangat memaksanya untuk berbuat demikian.

Antara contoh bagi pecahan kaedah ini adalah seperti berikut:

- (a) Seseorang yang berada dalam keadaan yang tersangat lapar atau dahaga kerana tidak memperoleh makanan atau minuman yang halal untuk dimakan atau diminum bagi tempoh yang agak lama; dengan kata lain, kebuluran yang boleh membawa maut. Pada waktu itu, dia dibolehkan makan atau minum makanan atau minuman yang haram setelah dia berusaha sedaya upayanya mencari makanan dan minuman yang halal. Keharusan tersebut diharuskan oleh syarak kerana disebabkan oleh keadaannya pada waktu itu yang sangat terdesak dan terpaksa. Semuanya adalah demi kemaslahatan dirinya yang terancam agar dapat menyelamatkan nyawanya; dan
- (b) Seseorang yang diancam nyawanya supaya dia murtad, maka harus baginya menuturkan kalimah kufur asalkan hatinya tetap beriman. Ini berlaku kepada 'Ammar bin Yasir yang telah memilih rukhsah dengan melafazkan kalimah kufur dalam keadaan darurat. Namun, hatinya tetap teguh dalam keimanan. Perbuatan 'Ammar itu adalah dibenarkan dan diakui Allah s.w.t. dalam firman-Nya pada surah al-Nahl, ayat 106.

6.6.2 Kaedah Pecahan 2: Apa yang Diharuskan dalam Keadaan Darurat Dikira Mengikut Kadar Keperluannya Sahaja (Ma Ubih li al-Darurah Yuqaddar Bi Qadariha)

Tahukah anda bahawa kaedah pecahan kedua ini sebenarnya mengkhususkan kepada kaedah yang pertama? Ini bermakna, keharusan perkara haram itu **ada tempohnya** dan bukannya untuk selamanya. Oleh itu, apabila terkeluar daripada situasi darurat tersebut, maka keharusannya terhapus dan ia kembali haram.

Sebagai rumusan, harus bagi seseorang mengambil yang haram kerana keadaan yang terpaksa, namun setelah keadaan kembali normal, maka hukum keharusan tadi akan kembali kepada status asalnya iaitu **haram**. Oleh itu, wajar syarak memberi batasan dalam mempergunakan rukhsah dalam darurat tersebut di samping memberikan kita sempadan agar tidak sewenangnya memanfaatkan kaedah ini. Ia adalah bersifat sekadar menyelamatkan diri daripada bahaya dan tidak lebih daripada itu.

Antara contoh bagi pecahan kaedah ini adalah:

- (a) Keharusan bedah siasat terhadap mayat. Tindakan ini hendaklah diukur berdasarkan kadar keperluan atau darurat sahaja. Berdasarkan kaedah, pembedahan tersebut dilakukan bertujuan untuk mengesan unsur jenayah, mengesan penyakit atau mengeluarkan bayi yang masih hidup daripada perut ibunya yang telah meninggal dunia. Begitu juga diharuskan membedah perut mayat kerana hendak mengeluarkan harta bernilai. Sebaliknya, sekiranya membedah mayat tanpa sebarang sebab syarak atau berlebihan daripada kadar keperluan, maka ia adalah haram;
- (b) Sekiranya tiada doktor wanita, maka diharuskan untuk pesakit wanita menggunakan khidmat doktor lelaki untuk mendapatkan rawatan. Namun, doktor lelaki tersebut hanya dibolehkan melihat dan menyentuh tempat yang sakit sahaja, sekiranya perlu; dan
- (c) Dibenarkan memelihara anjing untuk tujuan perburuan dan tidak boleh memeliharanya dalam jumlah yang banyak, melebihi daripada keperluan tersebut.

6.6.3 Kaedah Pecahan 3: Kemudaratan Tidak Boleh Dihilangkan dengan Mendatangkan Kemudaratan yang Lain (Al-Darar La Yuzal Bi Al-Darar)

Kaedah pecahan ketiga ini membawa maksud, biarpun kemudaratan itu mesti dihilangkan, namun bukanlah dengan cara menimbulkan bahaya seperti itu juga, apatah lagi dengan cara mewujudkan kemudaratan yang lebih besar.

Justeru, kaedah ini menegaskan bahawa kemudaratan tidak boleh sama sekali dihilangkan dengan kemudaratan juga. Ini adalah kerana sekiranya berlaku sedemikian, ia akan menambahkan masalah yang lebih besar. Ini adalah bertentangan dengan syariat Islam kerana Islam sentiasa mencari jalan untuk menolak sebarang kemudaratan terhadap manusia dan Islam juga merupakan

agama yang membuka ruang manfaat dan menutup ruang kemudaratan terhadap umatnya.

Boleh anda fikirkan apakah contoh yang boleh dikaitkan dengan kaedah pecahan ketiga ini? Antara contoh yang terbentuk daripada kaedah al-darar la yuzal bi al-darar ialah:

- (a) Tidak boleh bagi seseorang yang sedang dalam kelaparan atau kehausan mengambil makanan atau minuman orang lain yang juga akan mati kelaparan apabila makanannya atau minumannya diambil atau dicuri;
- (b) Tidak boleh doktor mengubati pesakitnya yang memerlukan tambahan darah dengan mengambil darah pesakit lain, di mana apabila diambil darah pesakit ini akan menyebabkan sakitnya menjadi bertambah parah; dan
- (c) Tidak boleh seseorang merosakkan diri orang lain untuk menghindarkan dirinya daripada bahaya atau merosakkan kehidupan orang lain demi menyelamatkan kehidupannya.

6.6.4 Kaedah Pecahan 4: Apabila Bertentangan antara Dua Kemudaratan, Hendaklah Dihindarkan yang Lebih Berat dan Dilaksanakan yang Lebih Ringan (Iza Ta’arad Mufsidatani Ru’iya A’zamuhuma Dararan Birtikabi Akhaffihima)

Kaedah ini bermaksud sekiranya terdapat dua kemudaratan atau perkara yang membahayakan dalam satu masa secara serentak, penyelesaiannya adalah kemudaratan yang lebih berat atau besar itu hendaklah dihilangkan dengan melakukan yang lebih ringan atau kecil mudaratnya. Dengan kata lain, apabila datang pada satu masa secara serentak dua mafsadah atau lebih, hendaklah diperhatikan dan diteliti mana yang lebih besar bahayanya. Oleh itu, kita perlu meninggalkan dan menghindarkan mafsadah atau mudarat yang lebih besar dan **melaksanakan yang lebih ringan mudaratnya**. Ini adalah kerana itu merupakan penyelesaian yang terbaik di sisi agama Islam.

Berikut adalah tiga contoh yang memberikan gambaran lanjut bagaimana kaedah pecahan keempat ini boleh dilaksanakan:

- (a) Doktor diharuskan membedah perut wanita mengandung yang mati, jika cara tersebut dapat menyelamatkan bayi di dalam kandungannya. Ini adalah kerana kemudaratan membedah mayat adalah lebih ringan berbanding membiarkan bayi tersebut turut sama mati;

- (b) Harus menenggelamkan orang yang terbakar tubuhnya, sekiranya perbuatan tersebut adalah lebih rendah risikonya dan dapat menyelamatkan nyawanya; dan
- (c) Diharuskan doktor membedah penderma organ untuk diberikan kepada pesakit kritikal yang memerlukan organ di mana dengan cara ini ia dapat menyelamatkan nyawa penerima organ tersebut. Kemudarat atau kesakitan yang ditanggung oleh penderma hasil pembedahan tersebut dianggap lebih ringan berbanding membiarkan pesakit kritikal tersebut mati begitu sahaja.

6.6.5 Kaedah Pecahan 5: Menolak Kerosakan Itu Diutamakan atau Didahulukan daripada Mengambil Manfaat atau Kemaslahatan (Dar'u Al-Mafasid Muqaddam 'Ala Jalb Al-Masalih)

Kaedah ini membawa maksud bahawa **menolak mafsadah (keburukan)** adalah lebih diutamakan daripada mengambil maslahah (kebaikan). Dengan kata lain, jika keduanya bertembung, maka kita perlu mendahulukan perkara yang menolak mafsadah.

Oleh itu, **usaha pencegahan mafsadah** adalah lebih diutamakan daripada usaha untuk memperoleh manfaat. Ini adalah kerana dikhawatir mafsadah tersebut akan merebak dan menyebabkan kewujudan mudarat yang lebih besar.

Dalam perkara ini, syarak memberi penekanan yang tegas terhadap perkara yang dilarang melebihi perkara yang diperintah seperti yang disabdakan oleh Rasulullah s.a.w.:

إِذَا أَمْرْتُكُمْ بِأَمْرٍ فَأَتُوا مِنْهُ مَا إِسْتَطَعْتُمْ وَإِذَا نَهَيْتُكُمْ عَنْ شَيْءٍ فَاجْتَنِبُوهُ

Maksudnya: "Apabila aku perintah melakukan sesuatu, maka hendaklah kamu kerjakannya seberapa yang kamu mampu dan apabila aku larang kamu daripada sesuatu perkara, maka hendaklah kamu jauhinya."

(Al-Bukhari, kitab: al-Itisam bi al-kitab wa al-sunnah. Bab: al-Iqtida' bi al-sunan Rasulillah. Bil 6744. Muslim, kitab: al-hajj. Bil. 2380)

Justeru, dimaafkan meninggalkan sejumlah kewajipan lantaran adanya masyaqqah (kesukaran atau keuzuran) seperti berdiri ketika solat. Namun, perlu diingat bahawa tiada kompromi sama sekali terhadap perkara yang dilarang, apatah lagi terhadap perkara yang merupakan dosa besar.

Antara contoh bagi pecahan kaedah ini adalah:

- (a) Tidak diragukan bahawa ada kebaikan dalam poligami, namun jika tidak diamalkan dengan baik, ia harus dihindari. Ini adalah untuk menjaga maslahah perkahwinan tersebut;
- (b) Berkumur dan istinsyaq (memasukkan air ke dalam hidung) adalah perkara sunat (maslahah) dalam wuduk. Namun, jika kita berpuasa, perbuatan ini tidak digalakkan kerana jika kita berlebih-lebih melakukannya, dikhawatirinya boleh membatalkan (mafsadah) puasa akibat tertelan air tersebut;
- (c) Menghentikan solat seketika, jika berlaku kecemasan seperti menolong orang yang lemas, membantu mangsa banjir kilat atau mangsa ragut dan seumpamanya; dan
- (d) Berdusta hukumnya adalah haram. Namun, ia diberi keharusan sekiranya untuk mendamaikan dua pihak yang bertelagah demi kebaikan hubungan kedua-dua pihak tersebut.

6.6.6 Kaedah Pecahan 6: Keperluan atau Hajat Menempati Kedudukan Darurat Sama Ada yang Bersifat Umum atau Khusus (Al-Hajah Tanzilu Manzilat Al-Darurah 'Ammah Kanat Aw Khassah)

Akhir sekali, mari kita lihat kaedah pecahan keenam. Masihkah anda ingat Jadual 6.1? Kaedah ini merujuk kepada kedudukan istilah penting dalam kaedah asas keempat ini. Berdasarkan kaedah tersebut, kita boleh katakan bahawa keperluan manusia sama ada yang bersifat umum (semua orang) atau yang bersifat khusus (satu golongan atau perseorangan) boleh beralih ke tempat darurat kerana syarak mempertimbangkan keperluan manusia terhadapnya. Jika sekiranya hajat ini tidak diletakkan pada kedudukan darurat, ia boleh menyebabkan manusia terbeban dan menghadapi kesukaran dalam menjalani kehidupan. Ini adalah bertentangan dengan syariat Islam kerana Islam merupakan agama yang penuh dengan toleransi, prihatin terhadap seluruh umatnya. Selain itu, kedatangan Islam itu sendiri adalah untuk menolak atau membendung kesukaran dan membawa kemudahan kepada manusia.

Sebagai rumusan, kaedah ini melihat kemudahan tidak hanya terbatas oleh kerana faktor darurat sahaja. Kemudahan itu juga diberikan ke atas faktor ada **hajat**, sebagaimana keringanan itu diharuskan dalam situasi darurat.

Berikut adalah antara contoh bagi kaedah pecahan keenam:

- (a) Diharuskan transaksi tempahan (al-salam), sewaan (al-ijarah), upahan (al-ji'alah). Biarpun kesemua transaksi ini menyalahi qiyas dalam fiqh Islam, namun kerana keperluan majoriti masyarakat, maka ia ditempatkan pada kedudukan darurat. Syarak telah memberi rukhsah (keringanan) dalam perkara ini, meskipun pada dasarnya transaksi seperti ini tidak sah kerana pada dasarnya, maksud transaksi tersebut adalah seperti berikut:
 - (i) Tempahan: Jual beli barang yang tidak ada ketika transaksi;
 - (ii) Sewaan: Ketika melakukan akad, ia belum mempunyai faedah atau manfaat; dan
 - (iii) Upahan: Pengupahan yang masih ada perkara yang tidak diketahui ketika melakukan akad.
- (b) Lelaki boleh memakai pakaian sutera disebabkan kerana sakit kulit, namun dalam keadaan biasa adalah diharamkan; dan
- (c) Diharuskan melihat kepada bakal isteri untuk tujuan perkahwinan.



SEMAK KENDIRI 6.1

1. Kemukakan tiga keadah pecahan yang terbentuk daripada kaedah kemudaratan mesti dihilangkan atau dihapuskan serta berikan satu contoh yang relevan bagi setiap kaedah tersebut.
2. Bincangkan secara berkumpulan kaedah hajat menempati kedudukan darurat sama ada yang bersifat umum ataupun khusus dan kaitkannya dengan muamalat Islam semasa.

6.7 ISU FIQH PERUBATAN SEMASA: KAITANNYA DENGAN KAEDAH ASAS 4

Akhir sekali, sebagai penutup, mari kita lihat tiga situasi perubatan semasa yang boleh dikaitkan dengan aplikasi kaedah asas keempat ini. Tiga situasi tersebut adalah pemisahan rawatan bagi pesakit yang mati otaknya, suntikan imunisasi rubela dan hukum eutanasia.

6.7.1 Pemisahan Rawatan Pesakit Mati Otak (*Brain Death*)

Muzakarah Jawatankuasa Fatwa Majlis Kebangsaan bagi Hal Ehwal Agama Islam Malaysia kali ke-25 yang bersidang pada 13 Disember 1989 telah membincangkan tentang pemisahan rawatan bagi pesakit yang mengalami masalah otak mati atau *brain death*. Muzakarah telah memutuskan bahawa memisahkan rawatan antara pesakit yang mengalami otak mati dengan pesakit yang masih mempunyai peluang untuk pulih di unit rawatan rapi adalah tidak bercanggah dengan Islam.

Ini adalah berdasarkan keterangan atau hujah yang diguna pakai dengan merujuk kepada kaedah fiqhiyyah *الضرر ثبيح المخطرات* atau kemudaratan mengharuskan perkara yang dilarang. Ini adalah kerana melakukan sesuatu yang boleh menyebabkan kematian seseorang adalah diharamkan oleh Islam.

Oleh itu, bersesuaian dengan kaedah yang bermaksud “darurat dikira mengikut keadaannya” maka jika boleh, setiap pesakit tersebut janganlah terus diasingkan kerana keharusan hukum diberikan, sekiranya berlaku keadaan yang terdesak. Usaha perubatan hendaklah dilakukan dengan penuh tanggungjawab supaya rawatan terhadap pesakit ini tidak diabaikan.

6.7.2 Pelalian Rubela (Imunisasi Rubela)

Muzakarah Jawatankuasa Fatwa Majlis Kebangsaan bagi Hal Ehwal Agama Islam Malaysia kali ke-21 yang bersidang pada 12 September 1988 telah membincangkan tentang pelalian rubela (imunisasi rubela). Muzakarah telah memutuskan bahawa vaksin rubela yang digunakan oleh Kementerian Kesihatan Malaysia pada masa ini tidak bersifat najis dan hukumnya harus digunakan untuk suntikan di dalam badan bagi mencegah penyakit rubela.

Antara keterangan atau hujah bagi hukum ini adalah merujuk kepada kaedah fiqh **الضروراتُ تُبْلِغُ الْمُحْظُورَاتِ** atau kemudaratan mengharuskan perkara yang dilarang. Penggunaan suntikan rubela adalah atas dasar hajat kerana hendak menghindarkan perkara bahaya iaitu penyakit rubela, maka diharuskan oleh syarak. Ini adalah berdasarkan kepada prinsip al-dharuriyat al-khams (menolak kemudaratan terhadap agama, jiwa, akal, keturunan dan harta), maka suntikan ini adalah perlu dan diutamakan.

6.7.3 Hukum Eutanasia (*Mercy Killing*)

Muzakarah Jawatankuasa Fatwa Majlis Kebangsaan bagi Hal Ehwal Agama Islam Malaysia kali ke-97 yang bersidang pada 15 hingga 17 Disember 2011 telah membincangkan mengenai hukum eutanasia atau *mercy killing*. Berikut adalah keputusan muzakarah tersebut:

Setelah mendengar taklimat dan penjelasan pakar serta meneliti keterangan, hujah dan pandangan yang dikemukakan, muzakarah berpandangan bahawa menghentikan hidup seseorang sebelum dia disahkan mati dengan menggunakan apa-apa cara dan bersandarkan kepada apa-apa alasan adalah **haram** dan dilarang oleh Islam. Sehubungan itu, muzakarah memutuskan bahawa perbuatan mempercepatkan kematian melalui amalan eutanasia (sama ada euthanasia secara sukarela, *non-voluntary* atau *involuntary*) atau *mercy killing* adalah haram menurut Islam kerana ia menyamai perbuatan membunuh dan ia juga bertentangan dengan etika perubatan di Malaysia.

Keputusan ini adalah selaras dengan firman Allah s.w.t. dalam surah an-Nisa', ayat 92:

Maksudnya: "Dan tidak harus sama sekali bagi seseorang mukmin membunuh seorang mukmin yang lain, kecuali dengan tidak sengaja..."

Hadis Rasulullah s.a.w. yang diriwayatkan oleh an-Nasa'ie turut menyokong perkara ini:

Maksudnya: "Sesungguhnya, Rasulullah s.a.w. bersabda, 'Janganlah kamu mengharapkan kematian. Jika seseorang itu baik, boleh jadi ia menambahkan kebaikan dan jika seseorang itu berbuat dosa, boleh jadi dia bertaubat (dan mengharap reda Allah).'"

Muzakarah juga menegaskan bahawa tugas doktor ialah menolong pesakit dalam perkara kebaikan. Oleh itu, membantu mempercepatkan kematian tidak termasuk dalam perkara kebaikan tetapi tergolong dalam perkara yang dilarang dan berdosa.

Walau bagaimanapun, dalam keadaan di mana pakar perubatan telah mengesahkan bahawa jantung dan/atau otak pesakit telah berhenti berfungsi secara hakiki dan pesakit disahkan tidak ada lagi harapan untuk hidup dan hanya bergantung kepada bantuan sokongan pernafasan, maka muzakarah memutuskan bahawa tindakan memberhentikan alat bantuan sokongan pernafasan tersebut adalah dibenarkan oleh Islam kerana pesakit telah disahkan mati oleh pakar perubatan dan sebarang rawatan tidak lagi diperlukan dan tidak lagi berkesan.

Begitu juga, dalam kes di mana pakar perubatan telah mengesahkan bahawa pesakit tiada harapan untuk sembuh dan pesakit telah dibenarkan pulang, maka tindakan memberhentikan rawatan utama dan hanya rawatan sokongan (*conventional treatment*) sahaja yang perlu diteruskan adalah dibenarkan oleh Islam. Ini adalah kerana keadaan seumpama ini tidak termasuk dalam amalan eutanasia yang diharamkan.

Walau bagaimanapun, jika rawatan atau alat bantuan sokongan tersebut digunakan untuk tujuan lain seperti alat bantuan mengeluarkan bendalir untuk memudahkan pernafasan, maka tindakan mencabut atau memberhentikannya adalah tidak dibenarkan.

Dalam kes di mana pakar perubatan terpaksa berhadapan dengan situasi di mana pesakit perlu berdepan dengan dua pilihan, sama ada meneruskan rawatan walaupun berkemungkinan memberi kesan sampingan yang boleh menyebabkan kematian atau terus berada dalam keadaan kesakitan yang berterusan, muzakarah bersetuju memutuskan bahawa harus bagi pakar perubatan memberikan rawatan atau ubat-ubatan kepada pesakit (seperti ubat penahan sakit), walaupun berkemungkinan memberi kesan kepada nyawa pesakit.

Sehubungan itu, selaras dengan kaedah fiqh تبيح المظورات "dalam keadaan darurat, setiap perkara yang ditegah adalah dibolehkan", amalan eutanasia secara tidak langsung (*euthanasia indirect*) atau ubat kesan berganda (*double-effect medication*) boleh dilaksanakan menurut pandangan syarak bagi memastikan kesengsaraan yang dihadapi pesakit dapat dikawal dan pelaksanaannya tidak langsung bertujuan untuk mempercepatkan kematian.

Muzakarah juga memutuskan bahawa dalam kaedah perubatan, mati otak adalah dianggap sebagai kematian dan apabila kematian tersebut disahkan oleh pakar, maka akan sabit semua hukum berkaitan kematian yang ditetapkan oleh syarak. Oleh itu, adalah harus memberhentikan rawatan bantuan sokongan (contohnya, penggunaan mesin ventilator) dengan persetujuan waris terdekat selepas disahkan oleh dua orang pakar perubatan yang tidak terlibat dalam urusan pendermaan organ.



SEMAK KENDIRI 6.2

1. Kemukakan pandangan ulama berkaitan dengan kaedah kemudaratan mesti dihilangkan atau dihapuskan.
2. Kemukakan tiga contoh perlaksanaan kaedah ini dalam fatwa semasa di Malaysia.
3. Jelaskan hukum dan berikan kaedah fiqh yang bersesuaian bagi permasalahan berikut.
 - (a) Merawat yang bukan mahram dan melihat auratnya;
 - (b) Mengubati penyakit dari sumber yang haram dalam keadaan terdesak yang mana ketika itu tidak ada sebarang ubat yang halal ditemui; dan
 - (c) Pembedahan kosmetik untuk merawat kecacatan anggota badan seperti pembedahan menghilangkan sumbing di mulut.

RUMUSAN

- Kaedah kemudaratan mesti dihilangkan atau dihapuskan merupakan kaedah asas keempat yang digunakan oleh ulama, mujtahid, hakim dan mufti dalam perundangan Islam. Ia membawa maksud bahawa sebarang bentuk kemudaratan wajib dihilangkan dan dihapuskan sama ada terhadap dirinya sendiri atau orang lain, terhadap mana-mana individu atau orang awam dan seluruhnya.
- Kaedah ini juga disebut sebagai “al-qawa'id al-khams al-kubra” atau “al-qawa'id al-asasiyyah”.

- Antara contoh penggunaan kaedah ini ialah disyariatkan hudud dan qisas untuk mengelakkan ancaman bahaya, disyariatkan semua bentuk khiyar yang ditetapkan oleh syarak untuk menghilangkan bahaya dan diharuskan memenjarakan atau dikenakan hukuman bagi orang yang membawa ajaran sesat.
- Terdapat enam istilah yang berkait rapat dengan kaedah ini. Enam istilah tersebut adalah darurat, hajat, 'ammah, khassah, mafsadah dan maslahah.
- Terdapat banyak dalil atau asal bagi kaedah kemudaratan mesti dihilangkan atau dihapuskan dari al-Quran dan hadis. Antaranya dari surah al-Talaq, ayat 6 dan surah al-Baqarah, ayat 23.
- Terdapat enam kaedah pecahan atau cabang yang terbentuk daripada kaedah al-darar yuzal. Antaranya ialah al-darurah tubih al-mahzurat, ma ubih li al-darurah yuqaddar bi qadariha dan al-darar la yuzal bi al-darar dan lain-lain lagi.
- Kaedah al-darar yuzal dan kaedah pecahannya amat penting dalam perundangan Islam dan banyak berperanan dalam menyelesaikan permasalahan fiqh. Antaranya dalam isu perubatan semasa seperti pesakit yang mengalami masalah kematian otak, pelalian rubela dan hukum eutanasia.

KATA KUNCI

Al-darar la yuzal bi al-darar	Al-qawa'id al-khams al-kubra
Al-darar yuzal	Bay' al-salam
Al-darurat tubih al-mahzurat	Dar'u al-mafasid muqaddam 'ala jalb al-masaalih
Al-hajah tanzilu manzilat al-darurah 'ammah kanat aw khassah	Ma ubih li al-darurah tuqaddar bi qadariha
Al-ijarah	
Al-ji'alah	



RUJUKAN

- Ab Latif Muda, & Rosmawati Ali. (2000). *Kaedah-kaedah fiqh*. Kuala Lumpur: Pustaka Salam.
- Abdul Aziz Muhammad Azzam, & Nashr Farid Muhammad Washil. (2009). *Al-madhkal fi al-qawa'id al-fiqhiyyah wa atharuha fi al-ahkam al-syar'iyyah*. Jakarta: Amzah.
- Al-Hasri Ahmad Muhammad, & Muhammad 'Azzam 'Abd al-'Aziz. (2004). *Al-qawa'id al-fiqhiyyah: Dirasat 'amaliyyah tahliliyyah muqaranah*. Kaherah: Universiti al-Azhar.
- Al-Nadwiyy 'Ali Ahmad. (2000). *Al-qawa'id al-fiqhiyyah*. Damsyik: Dar al-Qalam.
- Al-Quran al-Karim.*
- Al-Suyuti Jalal al-Din 'Abd al-Rahman. (1378). *Al-asybah wa al-naza'ir fi qawa'id wa furu' fiqh al-syafi'iyyah*. Beirut: Dar al-Fikr.
- Al-Zarqa' Ahmad Muhammad. (2007). *Syarah al-qwa'id al-fiqhiyyah*. Damsyik: Dar al-Qalam.
- Ibn Majah Abu Abdullah Muhammad Yazid Majah al-Rabi'i al-Qazwini. (1683). *Sunan ibn majah*. al-Riyad: Dar al-Salam li al-Nashr wa al-Tawzi'.
- Ibn Salih 'Umar. (2004). *Al-madkhala ila dirasat al-fiqh al-Islam*. Universiti Sharjah: Markaz al-Bihus wa al-Dirasat.
- Jabatan Kemajuan Islam Malaysia. (2013). *e-fatwa: Portal rasmi fatwa Malaysia*. Dicapai dari <http://www.e-fatwa.gov.my/>
- Muhammad Soleh Ahmad. (2002). *Al-qawa'id al-fiqhiyyah*. Kuala Lumpur: Pustaka Abdul Majid.